



**SCOLA  
LUMNEZIA**

**291.10**

---

Concept da protecziun en  
connex cun COVID-19

dils 04 da matg 2020

---

<i>relaschau</i>	<i>vigur</i>	<i>versiun.</i>	<i>midada</i>
MS	06.05.2020	1.0	niev



Per l'instrucziun da presenza naven dil matg 2020 ei vegniu elaborau in concept. Quel definescha las mesiras da prevenziun e garantescha cheutras in menaschi da scola che ademplescha las pretensiuns da Confederaziun e cantun. Plinavon reglescha el entgins fatgs organisatorics. Quei concept cuntegn suandonts puncts:

1. Situaziun da partenza
2. Instrucziun ed urari
3. Persunas d'instrucziun ch'ei stadas infectadas
4. Persunas d'instrucziun ord la gruppa da resca
5. Scolars ni confamigliars ord la gruppa da resca
6. Transports da scola
7. Persunas cun simtoms
8. Mesiras da higiena
9. Schurmetgs dils pulsts/plumatschs
10. Mascras
11. Distanzas
12. Luftegiar las stanzas
13. Desinfectar surfatschas ed utensils
14. Svidar las lingias d'aua
15. Sport
16. Pausas
17. Survigilanza dalla meisa da miezdi
18. Occurrenzas da scola
19. Viadis da scola
20. Scola el liber
21. Temps ordeifer la scola
22. Scolaziun
23. Material da protecziun
24. Informaziun dil personal
25. Informaziun dils geniturs

### **1. Situaziun da partenza**

Gleiti eis ei aschilunsch e l'instrucziun en scola cuntinuescha. Nus selegrein da puspei astgar beneventar tuts anavos en stanza da scola. Ils 29 d'avrel 2020 ha il Cussegl federal communicau che las scolas entscheivien cun l'instrucziun da presenza suenter ils 11 da matg 2020. Tenor novas publicaziuns ei il prighel ch'affons tochen 10 onns seigien purtaders ni transportaders dil virus COVID-19 fetg pigns. Sebasond sin quei fatg eis ei legrevlamein pusseivel dad arver las scolas naven da gliendisdis, ils 11 da matg 2020.

### **2. Instrucziun ed urari**

Ils geniturs ein obligai da tarmetter a scola lur affons cura che l'instrucziun da presenza entscheiva. Scolarets e scolars serendan il gliendisgis, ils 11 da matg 2020 sco usitau en scoletta/scola. L'instrucziun cuntinuescha tenor ils uraris da scola 2019/20. Ils scolars retuornan en scola cun lur material ch'els drovan per l'instrucziun. Las PI meinan neginas discussiuns cun geniturs davart dispensaziuns, mobein aviseschan ils geniturs directamein al MS.

### **3. Persunas d'instrucziun ch'ei stadas infectadas**

Persunas d'instrucziun ch'ei stadas infectadas procuran per ina lubientscha medicinala (miedi da casa) d'astgar instruir.



#### **4. Persunas d'instrucziun ord la gruppa da resca**

Persunas ch'appartegnan muort sanadad alla gruppa da resca sclareschan cul miedi da casa schebein ellas astgan instruir ni buca. Da principi eis ei recumandau a talas persunas da buca vegnir en scola.

La scola Lumnezia dispensescha consequentamein tut las persunas d'instrucziun ch'appartegnan alla gruppa da resca dall'instrucziun da presenza. Persunas vulnerablas ch'instrueschan tuttina, fan quei en atgna resca e san buca far regress sin la scola en cass ch'ellas vegnan infectadas.

#### **5. Scolars ni confamigliars ord la gruppa da resca**

El cass che la viseta dall'instrucziun ei muort motivs da sanadad digl affon ni da confamigliars absolutamein buca pussevla, s'annunzian ils geniturs directamein tier il menader da scola. Lez elaboraescha ensemen culs geniturs mesiras individualas, (p. ex. cuntinuaziun dall'intrucziun sin distanza), decida e communichescha la decisiun als pertuccai.

#### **6. Transports da scola**

Igl uffeci da survetsch «AutoDaPosta» svizzer cusseglia da duvrar mascras pil diever dils mieds publics, sch'igl ei buca pusseivel da tener la distanza da 2m. Tiels viadis da scolars ei quei adina il cass. Mintga scolar/resp. genitur decida sez schebein els fan diever dils mieds publics cun ni senza mascra. La scola reparta neginas mascras.

Mintga scolar drova puspei in bigliet per carrar cun la posta.

#### **7. Persunas cun simtoms**

Ei quei il cass tier in affon, informeschan ils geniturs immediatamein la persuna d'instrucziun da classa. Igl affon resta a casa en izolaziun. Tut ils affons/carschi che han giu contact stretg cun quei affon van medemamein en izolaziun. Persunas d'instrucziun cun simtoms stattan medemamein a casa. L'organisaziun el detagl succeda tut tenor situaziun e tenor indicaziuns actualas dils BAG.

Extract ord COVID-19 «Grundprinzip Aufnahme des Präsenzunterrichts an den obligatorischen Schulen»

*«Personen, welche Krankheitssymptome aufweisen, sollen sich in Isolation begeben.*

*Personen, welche einen engen Kontakt mit einer erkrankten Person hatten, insbesondere auch im Rahmen des familiären Zusammenlebens oder Intimkontakte, sollen sich in Quarantäne begeben gemäss den geltenden Empfehlungen des Bundesamtes für Gesundheit und den Weisungen und Anordnungen der kantonalen Gesundheitsbehörden.*

*Das Miteinander der Kinder im schulischen Setting wird nicht als enger Kontakt definiert. Falls jedoch gehäufte Fälle in einem schulischen Setting vorkommen, muss gemäss der Definition enger Kontakt vorgegangen und eine Quarantäne umgesetzt werden... »*

#### **8. Mesiras da higiena**

Negin dat il maun per beneventar in l'auter. Medemamein duein tuts evitar embratschadas.

Mintga PI repassa cun sia classa las reglas da higiena e cumportament edidas dil BAG, specialmein ils suandonts puncts: co lavar endretg ils mauns, co serrar giu l'aua cun agid dad in pupi, las reglas da distanza e cumportament.

Quei succeda l'emprema gada il gliendisdis endamaun, ils 11 da matg 2020. Sil scalem superiur duront ca. 20 min. dall'emprema lecziun. Sils auters scalems decida mintgamai la PI davart il cuoz da quell'introducziun. Silsunter vegn quella problematica adina puspei tematisada en scola.



Tut ils scolars lavan adina ils mauns avon ch'entscheiver la scola, pia la damaun cu els vegnan e mintgamai avon e suenter pausa. Tenor il BAG eis ei buca cussegliu da desinfectar ils mauns als scolars, ei seigi sufficient da selavar endretg.

Tuttina dispona mintga stanza da scola da mied per desinfectar en cass che quel vegn duvraus dallas persunas d'instrucziun per certas situaziuns.

### **9. Schurmetgs dils pulsts/plumatschs**

Schurmetgs dils pulsts da scolars vegnan allontanai pil mument. Il medem vala per cozzas, plumatschs etc.

### **10. Mascras**

Il menaschi da scola duess haver liug aschi "normal" sco pusseivel. Scolars duein purtar mascras mo en cass extraordinaris (ex. malsogna, simtoms accuts, ...).

Persunas carschidas san duvra in masca dil mument ch'ellas san buca tener la distanza da 2m ni sch'igl ei indicau per auters motivs. Mintga casa da scola dispona da ca. 300 mascras.) Mascras applicadas falliu meinan ad ina fallida segirtad ed ein contraproductivas. Situativ tematiseschan las persunas d'instrucziun l'applicaziun correcta dallas mascras culs scolars

### **11. Distanzas**

Ils scolars in denter l'auter ston buca tener la distanza. Denter ils carschi ed affons duei vegnir tenui la distanza da 2m. En scoletta e sil scalem bass duei quella regla vegnir risguardada aschi bein sco pusseivel. Igl ei evident che la realisaziun da quella ei buca aschi semplia sin quei scalem. Perencunter duein tut las persunas carschidas tener la distanza ina da l'autra. Quei vala era per la stanza da scolasts e duront pausas. Mascras duein vegnir duvradas mo excepziunalmein sch'igl ei buca pusseivel da tener la distanza.

### **12. Luftegiar las stanzas**

Ella scola veglia a Vella ed ella casa da scola a Cuschnaus duei vegni luftegiu las stanzas suenter mintga lecziun. Ella casa da scola nova duei vegnir luftegiu ton sco pusseivel. Da pausa duei vegnir luftegiu fetg en tut las casas da scola. Quei succeda cun schar aviert l'escha e scaffir cheutras in current d'aria. Ils pedels procuran per cugns per tener aviert ils eschs. Mintga PI ei responsabla ch'igl esch e sil pli pauc ina finiastra da sia stanza ein aviarts. La PI che ha survegionza da pausa mira ch'igl esch principal resti aviarts.

### **13. Desinfectar surfatschas ed utensils**

Ils pedels desinfecteschan pliras gadas a gi ils tschabergals ellas casas da scola e quels sils plazs pausa. Tut tenor situaziun e diever vegnan ulteriurs urdeins dil plaz pausa medemamein desinfectai, quei sin incumbensa dallas persunas d'instrucziun (survegionza da pausa).

Plinavon vegnan tut las fallas dils eschs/ils eschs, ils begls e las spinas medemamein desinfectai pliras gadas a gi. Cheutras sa ei era dar certs disturbis duront l'instrucziun. Las tualettas vegnan schubergiadadas sil pli pauc duas gadas a gi.

En mintga casa da scola stattan plirs sets per desinfectar surfatschas a disposiziun per cass urgents. Quels sesanflan mintgamai en stanza da scolasts, ella scoletta, els dus luvratoris ed en las stanzas da textil ed ellas hallas. Instruments, uaffens ed urdeins duein vegnir desinfectai sch'ei fa basegns. Davart quei basegns decida la persuna d'instrucziun pertuccada.

Il mied per desinfectar mauns duei buca vegnir duvraus per schubergiar surfatschas!



En classas pli grondas san ils scolars desinfectar sez ils utensils, quei denton adina sin incumbensa dalla persuna d'instrucziun.

#### **14. Svidar las lingias d'aua**

Ils pedels svidan venderdis l'aua dallas lingias dallas casas da scola cun schar cuorer l'aua freida e l'aua caulda independentamein ina da l'otra duront ca. 10 min. Tut las spinas duein vegnir aviartas.

#### **15. Sport**

Il rom sport vegn era instruius tenor urari. Sche pusseivel duei vegnir elegiu activitads cun aschi pauc contact corporal sco pusseivel.

Las personas d'instrucziun da sport desinfecteschan/schubregian tenor basegns urdeins e material duvraus per l'instrucziun.

Avon e suentar l'instrucziun da sport duei vegnir selavau ils mauns. Ils scolars duein era dessister da certs rituals (Handshake, High Five, ...)

[Ulteriuras informaziuns davart l'instrucziun da sport.](#)

#### **16. Pausas**

Las pausas han liug el liber. Ils affons duein buca parter maglias e bubrondas culs auters. Las personas d'instrucziun tematiseschon quei cun lur scolars. Quei ei cunzun necessari tier ils pigns. Vischala e pusada che vegn duvrada per pausas e per gentar vegn mintgamai lavada giu da rudien cun la maschina entras ils pedels.

#### **17. Survigilanza dalla meisa da miezdi**

Muort corona savein nus buca pli far diever dalla stanza per la meisa da miezdi el da casa val Lumnezia. Medemamein sa il personal dil da casa era buca pli surpender la survigilanza. Per quei havein nus decidu che las personas d'instrucziun surpendan quella entochen la stad. Quella succeda tenor plan detagliau.

Il gentar vegn furnius ell'aula sin las 12:00 uras dil da casa. Suentar gentar ca. 12:45 uras vegn il personal dil da casa per la maglia restada. Mintga scolar survegn ina butteglia da pet cun aua. El beiba directamein ord la butteglia e pren quella cun el suentar gentar.

Las lavurs dallas PI ein:

- Controllar il diember da scolars tenor gliesta
- Survir ils scolars (ils scolars vegnan cun lur tagliors per las maglias e per dabeiber al "buffet").
- Organisar il far uorden cun la vischala - deponer tut el liug definitiu)
- Survigilar ils scolars sil plaz pausa tochen las 13:00

Las lavurs dils pedels ein:

- Endrizzar l'aula tenor plan separau.
- Metter a meisa (mintga plaz survegn in tagliar, la pusada ed ina servietta) e semtgjar il buffet cun las bubrondas
- Lavar giu tut la vischala e las meisas
- Far uorden (las meisas san vegnir deponidas sin tribuna)
- Schubergiar il plantschiu



Decuors:

- Ils affons spetgan sil plaz pausa entochen che las PI lubeschan d'entrar.
- Las PI miran ch'ils affons lavien ils mauns avon che magliar.
- Cun entrar prenda mintg'affon ina butteglia dabeiber en siu plaz.
- L'aula ei partida en duas parts. Ina vart per ils scolars dalla scoletta – 4. classa, l'autra vart per ils auters.
- Suentar esser entrai, van ils affons van en lur plaz e spetgan tochen che lur meisa vegn vidlunder dad ir per la maglia. Quella vegn survida al buffet dallas PI.
- Suentar haver magliau (sin camond dallas PI) depona mintga affon la vischala e pusada el liug previu. Servietta vegn fiersa el sac da rumien.
- Ils affons restan suenter gentar sil plaz da scola. Davart excepziuns decidan las PI.

### **18. Occurrenzas da scola**

Occurrenzas cun publicum ein buca previdas. Occurrenzas internas tochen la fin da matg han segiramein buca liug. Davart occurrenzas dil zercladur vegn decidiu pli tard, considerond la nova situaziun.

### **19. Viadis da scola**

Ils viadis da scola ordinaris dalla primavera han buca liug. Igl ei pusseivel da far in viadi ella regiun (senza duvrar ils mieds publics). Per la realisaziun drova ei il consentiment dil menader da scola.

### **20. Scola el liber**

Sche las relaziuns lubeschan eis ei era pusseivel da far scola el liber.

### **21. Temps ordeifer la scola**

El temps liber valan las reglas da higiena, mo era la regla da 5 personas. Affons astgan giugar in cun l'auter, denton sche pusseivel adina ils medems ensemen e buca dapli che 5 personas. Perquei eis ei d'evitar rimnadas da scolars cun dapli che 5 personas era sin plazs publics.

### **22. Scolaziun**

Mintga persona d'instrucziun seprepara e sescolescha (cun indicaziuns dil BAG ed indicaziuns silla pagina dil cantun Grischun, cun informaziuns ord ils documents tarmess per mail, ...) aschia ch'ella enonuscha, sa realisar ed instruir las reglas vertentas als affons.

### **23. Material da protecziun**

Ils pedels procuran per il material da protecziun necessari. Avon che far in'empustaziun sediscuoran els cul menader da scola. Personas d'instrucziun che drovan material, retrain quel tiels pedels.

### **24. Informaziun dil personal**

Quest concept ei vegnius tarmess a tuttas personas involucadas el menaschi da scola cun l'incumbensa da studegiar il document e sclarir damondas cul menader. Il concept ei avon maun ella ewolke/spurtegl.

### **25. Informaziun dils geniturs**

Ils geniturs ein vegni informai cun in sriver ils 01 da matg 2020. Ulteriuras informaziuns retscheivan els dalla persona d'instrucziun da classa, ils 11 da matg 2020. Plinavon ei quest concept publicaus silla pagina d'internet dalla scola Lumnezia.



Cuschnaus, ils 05 da matg 2020

Conradin Caduff, menader da scola